

仙苑編珠序

天台山道士王松年撰

惟四

松年竊詳三古之前百王之後傳真學道證果成仙者何代無人抱朴子云秦大夫阮倉所祀有數百人劉向撰列仙傳止於七十一人葛洪復撰神仙傳有一百一十七人松年伏按登真隱訣及元始上真記道學傳自開闢以來皆是聖帝明王作神仙宗為造化祖何者如盤古為元始天王天皇氏為扶桑大帝伏羲氏為青帝祝融氏為赤帝軒轅氏為黃帝少昊氏為白帝顓頊氏為黑帝至於高辛唐虞夏禹周穆漢文並在仙籍松年又尋真誥棲觀傳靈驗傳八真傳十二真君傳近自唐梁已降接於聞見者得一百三十二人伏以誥傳文繁卒難尋究松年輒教蒙求四字比顏撮其樞要箋註於下目為仙苑編珠謹序

仙苑編珠卷上

大道自然混沌之先

道經云有物混成先天地生寂兮寥兮獨立不改周行不殆可以為天下母吾不知其名字之曰道莊子云天道有情有信無為無形神鬼神帝生天地在太極之先而不為高在六極之下而不為深先天地生而不為久長於上古而不為老一氣凝化盤古生焉

元始上真記云昔二儀未分溟濛濛日月未具狀如雞子混沌玄黃乃有盤古真人天地之精自號元始天王遊乎其中天形如巨蓋上無所係下無所根玄玄太虛無響無聲元炁浩浩如水之形若無此炁天地不生天地既分相去三萬六千里元始天王在天脊脊中住名曰玉京山山中有官殿竝金玉常呼吸天炁俯飲地泉忽生太玄玉女在石間出能言人形具足天姿絕妙號曰太元聖母元始君下遊見之乃招還上宮

天皇東立王母西族

自元始天王太元聖母還上宮之後經一劫乃生天皇氏治世三萬六千年受書為扶桑大帝居東極扶桑宮為東王公今世間皇太子居東宮象此也又生九光玄女號曰太真西王母居西極崑崙山故曰木公金母天地之尊神也伏羲八卦軒后五篇

莊子云伏羲得道以襲氣母書云伏羲治世感神龜負圖而出乃畫八卦造書契得道為東方青帝莊子云黃帝得道以登雲天經云軒轅黃帝登峨嵋山遇天真皇人授以靈寶五符治世三百年乃鑄鼎荆山鍊丹丹成有黃龍下迎羣臣同昇者七十二人以符藏於苑委山

顓頊元肇帝嚳龍輯

道學傳云顓頊高陽氏乘結元之輩北巡幽陵南巡交趾西巡滌沙東巡蟠木山水之神動植之類日月所照莫不屬焉周旋八卦諸有洞臺之山陰宮之丘帝召四海

神使運安息國天市山寶玉封而鎮之鑄羽山銅為寶鼎各獻一所於有洞之山莊子云顓頊得道以處玄宮帝嚳高辛氏咸九天真王三天真皇乘九龍雲輿降牧德之臺授以靈寶五符帝用之得道後封此符於鍾山

虞舜得藥夏禹道川

真誥云虞舜感北戎長胡大王獻白銀之霜十轉紫華服之而成仙吳越春秋云禹平洪水其功不就乃撻黃帝中經聖人所記在手九山東南號曰苑委承以文玉覆以盤石其書金簡青玉為字編以白銀禹乃南巡登衡山血白馬以祭不幸所求乃仰天而歎因夢赤繡衣男子云欲得我治水之方御龍之術可齋乎黃帝之嶽峻巖之下金簡之書在矣禹乃退齋季庚之日登苑委之山發石果得金簡玉書用以治水鑿龍門通百川天下有賴其功大矣今道門靈寶五符即此書也其探符處在會稽山禹穴是也

老君無極儀祖長年

孔子曰竊比於我老彭萬仙公云老子體自然而然生乎太無之先起乎無因經歷天地終始不可稱載終乎無終窮乎無窮極乎無極也又云世人謂老子當始於周代老子之號始於無數之初其杳杳冥冥渺邈久遠矣莊子疏云彭祖姓篋諱鏗顯項玄孫善養生性能調鼎進雉羹於堯封於彭城其道可祖故謂之彭祖神仙傳列仙傳並云歷夏經殷七百六十歲而不衰老後西之游沙莫知其終也故羅隱碑文云水運降靈始分輝於玄帝仙源啓祚乃襲慶於彭城星辰得濶渚之陽雲鶴度游沙之境也

廣成高卧尹喜精研

莊子云黃帝詣崆峒山謁廣成子問以理身奈何廣成子曰善哉問乎吾語汝至道之精杳杳冥冥至道之極昏昏默默無視無聽神將自正無勞汝形無搖汝精乃可長生故我修之千二百歲矣而形未嘗衰

本起傳并西昇經並云關令尹喜受老子道德五千言精研萬遍於蜀郡青羊肆隨老子白日昇天遊四海登三清下化八十一國焉

盧敖遊海若士冲天

神仙傳云盧敖者燕人也秦時遊北海至于蒙谷之山見若士焉方迎風而舞顧見敖曰吾與汗漫期於九陔之上不可久乃鍊身入雲中

赤松行雨霖封隨煙

列仙傳云赤松子者神農兩師也服水玉以教神農能入火隨風雨上下高辛時復為雨師今之雨師復是焉霖封子者為黃帝陶正有人能出五色煙以教封封乃積火自燒隨煙上下焉

黃山數百白石三千

神仙傳云黃山君者修彭祖之術年數百歲猶有少容也白石先生者中黃大夫弟子也至彭祖時年已三千歲矣嘗於白石山煮白石為糧故號白石先生

璠水周穆槐山僊伶

列子云周穆王乘八駿日行萬里至于崑崙之山與王母宴於瑤池王母唱白雲之謠王和之也列仙傳云僊伶者槐山采藥人也好食松實形體生毛長數寸兩目正

方能飛行逐走馬

醫龍師皇釣魚寇先

列仙傳云馬師皇者黃帝馬醫也有龍下向之張口皇曰此龍有疾乃針其脅下以甘草湯飲之而愈後數數有龍出陂告而治之一旦乘龍而去寇先者宋人也以釣魚為業得魚或賣或放或自食好種蒔荔食其葩實宋景公問其術不告遂殺之數年後踞宋城門鼓琴而去

弄玉鳴鳳蕭史同仙

列仙傳云蕭史者秦穆公時善吹簫能致孔雀白鸚鵡公有女曰弄玉好之公遂妻焉教弄玉作鳳鳴鳳止其臺上一旦乘鳳同去

李文黃白沈太紅泉

神仙傳云沈文太者九嶷人也得紅泉神丹去土符還年返命之道欲之崑崙駐安心二千餘年以傳於李文淵以竹根汁煮黃丹并黃白術去三尸法出此二人矣

宋倫遊空葛洪兀然

樓觀傳云宋倫字德玄年二十二日誦五千文服黃精白术感老君降授中景之道通真之經倫行之望巖申步日行三千里凌波涉險不由津路也道學傳云葛洪字稚川讀書萬卷求勾漏今意在丹砂著內外篇凡一百一十六篇碑誄詩賦百卷檄章牋表三十卷神仙傳十卷良吏傳十卷隱逸傳十卷集異傳十卷抄五經史百家之言方伎雜事三百一十卷金匱藥方百卷肘後要方四卷年八十一兀然若睡而

蛻

鄭思遠養虎須子割鮮

鄭思遠為洪之師也嘗於山巖間收得虎子兩頭其母已死若餵飼之長大俄有一雄虎來養前乃二虎之父也三虎出入相

隨駝藥囊經書隱於括蒼山仙去列仙傳云涓子齊人餌木三百年釣於荷澤得鯉魚剖之腹內得符能致雲雨

少翁拜山宋萊掃市

真語云昔妻少翁入華山中拜山二十年遂一旦見西嶽仙人授以仙道也萊莊公時市長宋萊子恒洒掃一市忽遇一乞食公唱歌萊子知是仙人乃隨之積十三年遂得仙道為中嶽仙人

永伯七星王通篋子

神仙傳云陳永伯得七星散方服之二十八日忽不知所在有兒年十一服之二十八日亦不知所在本方云服之三十日自得仙去王通字伯達與人治病無不愈者並不用針藥但令坐一布帕上須臾自愈有一竹篋子長數寸有一弟子姓錢忽一夜大雨命弟子以九節竹杖擔此篋子兩中行衣不濕登山入一石室中中有二人同坐遙發篋子取玉舌黃三枚三人對鼓之良久收篋內篋中却擔迴二人謂遙曰

早來莫久聽人間後百餘日遙復歸隱
子一去不復還後三十年弟子見在馬蹄
山也

介君竹杖左慈木履

神仙傳介象字元則會稽人甚有道術其
大帝禮重之使作變化種瓜果皆立生可
食帝思繼魚鱗象於殿庭作一方坎著水
象垂釣於坎中得魚帝曰蜀蓋不可得象
曰請差人買與五百錢象書符置竹杖中
令使人騎之閉目唯聞風聲到蜀買蓋迴
廚人切繪未了左慈字元放有道術孫策
欲殺之驅於前慈著木履竹杖徐徐而行
孫公奔馬追之常相去百步後曹公殺之
唯見一束草也

老父光白刺都氣紫

神仙傳漢武帝東巡見泰山下老父頭上
有白光高數尺帝問之老父曰臣年八十
五特衰老有道士教絕穀服水飲水并作
神枕用藥三十二味臣今年一百八十矣
日行三百里刺子都漢武帝出遊見其頭

上有紫氣高大餘問之對曰臣今已年一
百三十八所行者彭祖之道也帝傳之不
能行子都年二百餘歲服木白日昇天
河上傳經漢文得旨

葛仙公云河上公者莫知其姓名也漢孝

文皇帝時結草為菴于河之濱常讀老子
道德經文帝好老子之言有所不解數句
遣使問不告帝親詣問之晉天之下莫非
王土率土之賓莫非王臣子雖有道由朕
民不能自屈何乃高乎朕足使人富貴貧
賤須臾河上公乃拊掌坐躍舟舟在虛空
之中去地數十丈而告帝曰余上不至天
中不累人下不居地何民之有陛下焉能
令余富貴貧賤帝乃稽首禮謝河上公遂
授注解道德經二卷與文帝

婁政變化墨子朱英

神仙傳婁政治墨子五行記服朱英九年
八百餘歲色如童子能化一人為百人百
人為千人作萬能立起風雲步行水上
令水中魚鱗盡上岸能口吐五色氣方十

里上連天能騰身虛空無所不至墨子名
翟宋大夫也著書曰墨子善戰守之且巧
與公輸班較機變以雲梯不足攻宋而止
後入狄山中學道有神仙授以翟朱英丸
方通靈五行變化凡二十五卷因遊五嶽
不知其終也

孫博同道班孟異名

神仙傳孫博治墨子五行術能令草木金
石人物盡成猛火他人以水沃之終不滅
須博自止之乃滅物皆如故不焦又能引
數百泉步行水上不沾不濕或布席坐於
水上飲宴作樂又能從石中來去後入林
慮山合丹仙去班孟者是女子能飛行坐
空入地飛屋瓦指地成井能含墨噴紙成
篇章飲酒餌丹四百餘歲後入天台山去
也

王綱二氣章震五行

神仙傳天門子姓王名綱善補養之法行
玄素之道年一百八十歲有童女之色乃
服珠醴仙去入玄洲章震者王子也師魯

子精於五行之意以養性治病消災立起
風雲雷雨化草芥瓦石為六畜龍虎能分
形為數百千人步行江海能噴水成珠玉
不變能九泥為馬日行千里能吐五色氣
能投符召魚鼈能使人見千里外物能呪
水治病立愈入崆峒山合丹白日昇天
九靈却禍北極青精

神仙傳九靈子姓皇名化得還年却老胎
息之道又得五行之要能辟五兵虎狼伏
千秋消萬禍專行此道大得其効在人間
五百歲服丹仙去北極子姓陰名恒得保
神養性貴精之道其要曰以金冶金謂之
真以人治人謂之神後服神丹仙去
太陽華髮絕洞長生

神仙傳太陽子者姓離名明得玉子之道
好酒恒醉玉子責之對曰晚學性剛俗態
未除故以酒消其驕慢耳善修五行之道
在人間五百年肌膚光潤面目輝華而鬚
髮皓白也著七寶之術深得其要服丹而
仙絕洞子者姓李名備其術曰弱能制強

陰能弊陽常若臨深履薄長生之道也年
四百歲顏色不衰著書三十篇服還丹而
仙
陽女得妙陰女亦成

神仙傳太陽女姓朱名翼增益五行之道
其驗得妙年二百八十歲色如桃花如十
七八人也得神丹仙去太陰女者姓盧名
金好玉子之道未得其妙乃當釀沽酒遇
太陽子遇之遂教以補養之術蒸丹之方
服而仙去

玄女行廚南極通靈
神仙傳太玄女者姓項名和少喪夫乃學
道治玉子之術坐置行廚變化無所不至
南極子者姓柳名融能含粉成雞子如真
能咒杯成龜鼈教咒水成美酒服雲霜丹
仙去也

奉林開氣周君誦經
真誥云妻奉林者學道於嵩山積四百年
能閉氣三日不息服黃連以致不死也周
君兄弟三人學道於常山中九十七年遇

老人授以真經七卷三人共讀之忽有白
鹿見二弟放經看之周君獨不看數滿萬
遍翻然冲天二弟為看鹿經忽火起焚之
不得冲天為心不定也
伯真心正季道天青

真誥云姜伯真行道采藥遇仙人使平立
於日中其影偏仙人曰子心不正因教以
日出三文時披心向日覺心中暖即正也
伯真旦旦行之得道也徐季道學仙遇神
仙教云子欲學道當中天青林天曆躡雙
白徧二赤也行之得道

劉安接士八仙降庭
神仙傳淮南王劉安好道聞有術之士不
遠千里卑辭厚禮以迎之時感八仙降焉
一人能坐致風雨立起雲霧一人能束縛
虎豹召致蛟龍一人能分形易貌坐在立
亡一人能乘虛步空越海渡波一人能入
火不灼入水不濡一人能千變萬化恣意
所為一人能防災度厄長生久視一人能
煎泥成金凝汞為銀也

丁鶴人語蘇鹿牛形

飛天仙人經云丁令威七歲入山求道千
年化鶴歸鄉下華表柱頭歌曰我是昔日
丁令威學道千年今始歸也蘇君傳蘇軾
者郴州人也小時牧牛牛化為白鹿得道
後歸鄉駐牛脾山上州縣官吏同往禮謁
日暮君展黃庭經化為大橋直跨城門官
吏登橋而還也

大足地黃唐鳳石室

神仙傳大足服地黃得道唐鳳服中嶽石

靈得道

墨客黃連羨門青實

神仙傳墨客公服黃連得道羨門子服甘

菊青實散得道

三老鍊氣四皓餌漆

神仙傳長陵三老服陰鍊氣乃得成道又

云商山四皓服九加散餌漆得道

妙真入洞暨瓊飛栱

道學傳女真錢妙真幼而學道居句曲洞
山年八十三誦黃庭經數滿乃與親友告

別服黃白色藥了乃入燕洞經宿明晨女

冠道士競往候之忽聞洞有雷霆之聲見
龍鳳之車自西北而來載以昇天也暨蘇
瓊居於潛天目山學道蟬蛻之後依俗禮
葬之數年中忽有聞山蓋山旬然如雷震
之聲鄉人往看見棺版飛空上片落兩村
今為上片村底版落北村今為下版村兩
邊版同在一處今為版同村因此昇天也
遇藥朱瑛盜術女九

列仙傳朱瑛廣陽人病癩道士阮丘與

七物藥日服九九百病愈教以誦黃庭經
隨丘入浮陽山八十年鬚髮俱黑仙去女
九者陳市上沽酒婦人也仙人過之寄素
書五卷丸乃盜寫其文得養性之道不羸
不老棄家而去不知所之

常生止雨方回印關

列仙傳平常生者數死復生在穀城鄉忽
大水出所害非一生乃登缺門山大呼言
常生在此雨水五日必止如其言後數十
年復為華陰門卒方回者堯時隱人也鍊

食雲母夏曆末為官士為盜所劫閉之室

中回化身而出更以方回印封其戶時人
曰得回一丸泥關可開也
仇生木正子先竹竿
列仙傳仇生者湯時為木正食松脂自作
石室仙去周武王幸其室而祀之呼子先
者卜師也壽百餘歲夜有仙人持竹竿至
呼子先乃與酒家姬各騎一竹乃龍也上
華陰山仙去

朱仲取珠任光賣丹

列仙傳朱仲會稽人常於市上取珠高后
時求三寸珠仲獻之賜五百金魯元公主
私以七百金仲獻四寸珠景帝時復獻三
寸珠數十枚而去不知所在任光者上蔡
人善餌丹賣於郡里聞趙簡子聘之於柏

梯山三世不知所在

牧豕商丘鑄冶陶安

商丘子胥者高邑人好牧豕吹竽服水葛
蒲飲水不飢不老人世世見之三百年不
知所之陶安公者六安鑄冶師也一旦火

散上紫色衝天須臾朱雀止治上曰安公
與天通七月七日迎汝以赤龍至期赤龍
到大雨安騎之而昇天

黃真武陵劉阮桃源

傳云漁人黃道真武陵人棹漁舟忽入桃
源洞遇仙劉晨阮肇剡縣人也採藥於天
姥岑迷入桃源洞遇諸仙經半年却歸已
見七代孫子

初平松脂鳳網花弁

神仙傳皇初平丹谿人也年十五家遭牧
羊遇道士將入金華山四十年其兄初起
尋之相遇問羊云在東山往看盡是白石
初平叱之悉化為羊兄弟二人共服松脂

茯苓至萬日生在立亡同昇天初平改姓
赤氏號松子初起號赤須子今婺州赤松
觀是其地也鳳網者元陽人也常採百草
花水漬泥封埋之百日丸之死者以一丸
內口中立活網服藥不老仙去

呂恭遇仙沈建寄婢

呂恭字文敬少好服食於太行山採藥忽

見三仙人曰子好長生乎吾一人姓呂字
文起公與吾同姓合得長生乃隨仙人去
經二日遂授祕方一首曰汝隨吾二日已
二百年也乃還鄉已見十餘代孫呂習者
作道士涕泣拜迎遂傳其方其家世世無

有老死者皆得仙去沈建者丹陽人得導

引服食之術凡有病者見之即愈嘗遠行
寄二婢三奴一驢十羊各與藥一丸經三
年並不飲食建既還乃各與一丸藥喫飲
食如故建乃舉身飛行或去或還三百年
後不知所在

華生易皮樂長童子

神仙傳華子期者師角里先生得靈寶隱
方合而服之日行五百里力舉千斤每一
歲十度易皮後乃仙去樂子長者齊人也

遇霍林仙人授巨勝赤松散方曰蛇服成
龍人服成童子長服之年百八十歲色如
少女妻子九人皆服之老者少壯少者不
老登勞盛山仙去
叔卿不臣伯陽亦死

神仙傳中山術叔卿服雲母得仙漢武帝
閑居殿上忽見一人乘雲駕白鹿集於殿
前帝驚問為誰答曰我中山術叔卿也帝
曰子非我臣乎叔卿不對忽失所在也帝
甚悔恨魏伯陽吳人也入山作神丹將三

弟子一白犬丹成飼犬犬死乃自服又死

一弟子姓虞服之亦死二弟子棄之而出
伯陽乃起將服丹弟子并白犬而去逢樵
人乃作書寄鄉里并二弟子伯陽作參同
契五相類凡二卷盡神丹之旨也

方朔歲星傳說箕尾

登真隱訣云東方朔字曼倩仕漢武服初
神丸至宣帝時棄官於會稽賣藥後昇為
歲星又莊子云傳說得道以相武丁奄有
天下乘東維騎箕尾而比於列星

沈羲三車安世二士

神仙傳吳郡沈羲學道於蜀但能消災除
病救濟百姓功德感天因與妻共載路逢
白鹿車青龍車白虎車騎從皆朱衣執矛
仗劍告羲曰君有功於民黃老今遣仙官

下迎有三仙人以白玉版青玉界丹玉字
披氎遂載昇天陳安世為灌叔本客每行
見鳥獸皆下道避之未嘗殺物年十三叔
本好道忽有二仙人化為書生詣叔本叔
本不悟待之不至乃誦安世曰汝好道可
教乃與藥二丸服之不復飲食叔本乃反
師之安世臨昇天乃傳其道叔本亦仙而
去

八百歷代李阿弓市

神仙傳李八百蜀人莫知其名時人計其
數已八百歲故呼之遊行不定知唐公房
可教乃託廢疾試之百藥不可云須人秘
之房乃令二婢紙之不可房乃自為紙之
不可又令妻紙之云須得美酒三斛浴之
浴訖體如凝脂遂令公房并妻三婢並入
酒中浴之並顏如童子乃以丹經授公房
房合服仙去李阿者蜀人世世見之不老
常乞食於市有古強者常隨之強時年十
八見阿如五十許人至強年八十餘阿亦
如故忽告人曰崑崙召吾當去遂不復還

也

仙苑編珠卷上



仙苑編珠卷中

天台山道士王松年撰

積子易貌桂父變容

列仙傳積子者鄰人服松子茯苓百年時
壯時老時好時醜忽逢一黃犢來過沽酒
陽鄰家女悅之隨積子出取桃李味皆甘
吳邑人伺而逐之共牽黃犢耳而走不能
追也數十年見在潘山下冬賣桃李也桂
父者象林人色黑時白時黃時赤常服桂
并葉以龜腦和之千九至今荆州南有桂
丸也一旦飄然入雲而去

務光蒲葦阮丘薙葱

務光夏時人耳長七寸好琴服蒲葦根湯
讓天下不受負石身投壑水以自溺後四
百年至武丁時復見也阮丘者蛆山上道
士披髮耳長七寸口中無齒日行四百里
常種慈蘆百餘年人不知之

赤芥餌丹毛女餐松

赤芥者巴戎人也為碧鷄祠主薄餌丹與
消石服之三十年反如童子毛髮生皆赤